


三十三冊

卷之十五

文獻指掌
五

林下筆記



扶下筆記卷之十五

文獻指掌編目錄

王世貞八閩儀

登極製

神清味質味道


成賦先復

素衣無迴世弟服食

提上既期表裡之始

周甲遠寄

好能遠寄



林下筆記卷之十五

文獻指掌編目錄

五

王世子入闕儀

登極賀

禪後陳賀非禮

成服先後

景宗昇遐世弟臨喪

親上致詞表裡之始

周甲陳賀

母臨陳賀

婚禮不用樂

壬辰舊甲

王世孫上䟽

呼復

永徽殿祝文

易月之制

顯德嬪服制

睿宗服制

貞熹王后服制

白笠之制

大喪服制議

啓運宮服制

仁烈王后服制

昭顯世子服制

仁祖服制

追製喪服議

孝宗服制

練服變改議

仁宣大妃服制

中宮從服承重當否議

仁敬王后服制

明聖王后服制

百官進見服

謁新舊陵儀

儒生白衣黑巾儀

仁顯王后服制

君臣服制復古禮

端懿嬪服制

景宗朝命復君臣服制

當杖之列

練時腰經

孝章世子服制

宣懿王后服制

孝純嬪服制

懿昭世孫服制

正風俗

三綱行實

作聖圖

禁再嫁

厚風俗

呂氏鄉約

感人為孝

漢陽新宮宴

賜宴掌樂院

九進饌

樂與呈才不同

進豐呈

內宴

以鴨代宴

國恤輦輿用玄

元孫有屋輜

箕子杖

箕子笏

皇明賜冕服

明昇母

世子冠服

遠遊冠

世祖儉德

宣廟儉德

世子服色

世子玉帶

世孫水晶帶

貞慎翁主喪

拜陵儀

焚銀鼠裘

始正大帶之制

襄陽玉圭

平陽古圭

集祥殿古玉帶

英廟儉德

祭冠

胄背

金帶之戲

宦官服色

預賜品帶

朱溪正論儒服疏

煖帽

君賜不敢私受

黑團領之制

服色紅色議

利市之禁

紗帽

大明集禮外國使臣服

公服

侈風

朝服呈文

狹袖議

入直戴冠戴笠

侈風之變

白衣之禁

絲帶

綠袍之始

玉頂子

表文之制

私家立廟

別廟

紙牒

正寢

三獻

合設單設之論

澆奠床及道先生致祭

立後

已死者追成繼後

為系孫以死者入後

鮮于氏

關北人系後只告官

濟州俗變

相臣卒百司吏隸設奠

為罪人服

喪後服

禪月出仕

外任身死給駕牛

紅緞銘旌

外棺着漆

閔家議主喪

金家嫡庶之分

1

林下筆記卷之十五

月城李裕元景春輯

文獻指掌編

王世子入闕儀

仁祖乙酉丹孝宗為世子始有此儀景宗辛丑丹英宗為世弟亦遵用

登極賀

仁宗嗣位初都事金就文上疏追論嗣位受賀之失曰蓋當嗣位之際釋衰服冕為宗社生民之重不可以私恩廢也百官班賀雖臣子之所不得已而殿下

在諒闇之初不宜下受慶典優批嘉獎

禫後陳賀非禮

宣祖二年行明宗禫祭舊例禫後陳賀李珣曰喪制甫畢遽即受賀實為未安百官哭泣之餘旋即陳賀是歌哭同時也上劄請行慰禮遂傳賀

成服先後

肅宗六年仁敬王后昇遐在於十月二十六日初更復禮舉哀行於四更後在家諸臣之承訃者或在二十六日或是在二十七日而大殿聞訃差退一日故喪次羣臣則成服於初一日陪從時御所者勿論承訃

先後從服於初二日其朝臣從承訃先後分兩次或行於初一日或行於初二日

景宗昇遐世弟臨喪

景宗四年上薨世弟令以被髮當否問議儒臣禮曹以儒臣議達五禮儀斬衰條有世子太君以下被髮之文邸下於大行王既有繼體之義則變服之節一依五禮儀恐合禮意從之

親上致詞表裏之始

英宗十九年上親行元朝陳賀禮于大妃殿舊例元朝賀只令百官行之是時上奉惠順慈敬大妃躬率

百官行于仁政殿階上先時命館閣之臣議于大臣
撰進致詞及慈殿答教至是上親傳致詞及表裏以
授近侍龍亭鼓吹導詣東朝閣外以進大妃傳宣答
教既罷仍御仁政殿受百官賀翌年甲子大妃誕日
親行陳賀亦如之

周甲陳賀

英宗二十三年大妃殿周甲上行陳賀禮率百官親
進箋文致詞表裏行禮于仁政殿階上

母臨陳賀

英宗二十七年上以大妃母臨五十年率百官進箋

婚禮不用樂

英宗三十八年教曰禮云三日不舉樂思嗣親也婚禮不賀人之序也我朝婚禮雖賀軒懸陳而不作旣載禮文此亦三日不舉樂之義而獨於賀猶存此予所以一欲釐正者也此後大婚賀勿為舉行

壬辰舊甲

英宗四十九年壬辰十月初四日以宣廟自龍灣還御慶運宮之年月日上率王世孫幸是宮受賀

王世孫上疏

英宗四十九年九月上御崇政殿王世孫率百官陳

賀初王世孫上疏以寶齡之望九旬盛事之回舊甲
勿藥之有喜慶光御之滿五紀舟梁之十六年請於
誕彌之辰陳賀以疏幽授春坊官呈于政院仍下堦
俟批上笑見春坊官問其由笑曰心雖金石豈不感
動仍命告由陳賀

呼復

英宗甲辰李明彥啓曰顯宗大喪禮判張善徵行呼
復禮故庚子國恤時使禮判李觀命呼復而觀命以
為善徵外戚故雖行此禮實非宗伯之任也終不行
之而當時未有非之者宜考禮定式上以問李光佐

對曰五禮儀使內侍呼復喪禮從先祖命今後一遵五禮儀

永徽殿祝文

英宗朝景宗魂殿及永徽殿祝文稱弔無可考據命春秋館考出仁宗明宗實錄于江華則明宗告仁宗祝稱皇兄稱孤弟而永徽殿屬稱未有明證命弘文館博考弘文館奏曰取考昭代典則皇明世宗皇帝稱武宗皇后為皇嫂生既稱嫂祝辭宜無異同但上自為之稱終無可據之文命議諸大臣李光佐奏殯殿告文屬稱固當依明宗實錄稱孤弟皇兄而至於

端懿王后稱嫂則可也自上稱叔則不可上曰明宗之稱孤弟何意光佐對曰當時中宗喪制未畢仁宗昇遐故稱孤弟也趙恭億對曰杜氏通典中晉時有以哀嗣稱者但三年內稱哀可也三年後稱孝未知何也上曰魂殿則稱弟永徽殿則稱嗣不免斑駁今若遵明廟故事而稱皇元倣皇朝典禮而稱皇嫂用東晉之文而內外殿并稱哀嗣則遵周法祖兩得之矣光佐曰三年內稱哀嗣三年後稱孝嗣可無窒碍或者以哀嗣嗣王兩嗣字重疊為未安然哀嗣之嗣嗣屬之義也嗣王之嗣承嗣之義也命問議于贊善

鄭齊斗亦如光佐言於是魂殿永徽殿遂補哀嗣嗣
王臣三年後補孝嗣嗣王臣

易月之制

世宗四年太上王薨禮曹請用易月之制上曰易月
之制漢唐以下中主所為非先王之法大妃之喪禮
官承父王之命定用易月之制予再請於父王山陵
之後乃釋衰服今欲使釋服於二十五日則反不及
前喪予欲衰服三年然不可以衰服視事故欲於卒
哭後權免喪服以白衣視事若遇喪事皆用喪服祥
禫之制一遵古禮百官可依易月之制議政府六曹

啓曰太祖之喪太上王從易月之制宮中實行三年之喪臣子一也殿下在哀經而羣臣釋服有違於義乞令羣臣卒哭後釋服許之

顯德嬪服制

世宗二十三年顯德嬪卒從黃喜等議卒哭後喪主除衰服白衣烏帽角帶常時魂殿上食及朔望俗節別製衰服行祭期年而止

睿宗服制

成宗元年世祖大王喪畢後議大王大妃殿侍從人服色講定河東府院君鄭麟趾等議大王大妃侍從

之人服色宮內從吉朝廷因素服以終睿宗之喪蓬
原府院君鄭昌孫等議大王大妃已除睿宗之服世
祖喪畢後凡侍從者禮宜從吉朝廷一宮之內吉凶
混處其於情禮似未穩當世祖禫後權制從吉可也
然世祖禫及睿宗小祥纔隔旬月權着淡服至睿宗
練日服練行祭而除喪仍禫服中月而祔廟如何命
從昌孫議仍傳曰今雖從吉外人豈知予不得已之
意哉其諭諸中外俾知其由遂下懿旨于禮曹曰三
年通喪本乎天性固當自盡然予方聽斷庶務屬闕
世祖大王之服凡侍從者亦宜從吉第睿宗之喪

未除一國之內吉凶相混其於情禮實為未穩古者諒闇三年不言厥後從權即政且以日易月二十七日而除是宣樂為出於不得已也以今揆古諒闇之制不可行於今日問于宗戚大臣皆以為從權變通合降殺其自睿宗小祥過後釋衰從吉三年祭畢陞祔太廟如禮禮曹啓曰易月之制自漢文以來行之已久歷代因襲而不敢改者蓋禮時變亦出於不得已也我朝恭靖大王之喪以日易月而練祥悉遵三年之制文宗之喪服未闋而事有不得已者從權即吉而祥禫亦待再暮逾月實我太宗之所已行世祖

之所相權親定者今睿宗之喪小祥從吉三年而祔廟亦合祖宗舊制當依懿旨施行

貞熹王后服制

成宗十四年上以貞熹王后當國家危疑之際參決庶政社稷賴安欲依大王例行三年之喪問議于政府六曹弘文館臺諫韓明澮尹弼高洪應等議請從權通變行三年之喪弘文館議曰禮記服問云君之母非夫人則羣臣無服疏曰君母是適夫人則羣臣服期夫禮經聖人之定制先王之定法王后三年之喪不載禮經豈可以功德之多寡人情之厚薄輕易

變更哉時右參贊許琮議與洪應等同及聞弘文館
議茫然自失曰吾過矣即上疏自劾然上竟行三年
之喪金訢論服制疏曰貞熹當國家危疑之際首定
大策權同聽斷保佑乂安功在社稷而殿下悲傷念
慕以羣臣服替之典為嫌欲從三年之制以后而從
王制非先王制禮之意也或曰母后聽政事既出於
非常則喪制亦不可局於常制女主聽政喪服之制
可同於大王則末流之弊可勝道哉

白筵之制

仁宗元年中宗大喪金就文請行三年右議政尹仁

鏡啓卒哭後燕居服依成廟時貞熹王后國恤服制
當用黑笠命臺閣弘文館議之弘文館議曰祖宗朝
皆用白笠而成廟始變舊制然其時下教有曰變凶
從吉心所不安則成廟之意亦可見矣且國俗平日
常着白衣今若用黑笠與平日服色無異請一依五
禮儀卒哭後白笠之制從之明宗十二年文定王后
卒哭後上及百官皆着黑笠祖宗之制卒哭前上下
皆着衰服卒哭後視事時權着白衣烏紗帽黑角帶
燕居時着白衣笠帶凡干喪事着衰服成宗朝議者
以為既着烏紗帽則笠亦當黑遂於卒哭後着黑笠

中廟賓天扃護使柳灌建議未脫衰服遽着黑笠既
乖禮意且非祖宗之制遂定白笠之制灌等被禍議
者更定黑笠之制至是禮官議定白笠之制領相尹
元衡曰白笠乃柳灌所建之議不可遵用大臣皆從
元衡言遂改儀注朝臣知其非莫敢發言丁卯大喪
李滉以五禮儀君臣喪制多不倫欲作朱子君臣服
議參酌更定諭該曹參判朴淳難之議遂寢上令政
院考恭懿殿服制時李滉在京對以禮嫂叔無服自
上合無服衆莫敢違奇大升以遠接使從事官延浚
入城曰仁廟君臨一國今上自有繼體之服豈可援

嫂叔之禮乎。滉聞而大悟曰：明彥之言是也。倉卒失對，吾不免罪人云。卒哭禮畢，後復命行白笠終喪之制。金誠一書贈日本僧宗陳曰：君喪則卿大夫以下百官斬衰三年無職人，則白冠白衣白帶；王后服則百官齊衰期年無職人，則白衣冠帶。凡國喪公朝著布帽布團領布褱角帶。燕居則白衣冠帶。宣祖八年，仁順王后薨，持平閔純請於卒哭後依宋孝宣禮，以白衣冠視事。上命議大臣領議政權轍等以為卒哭後視事玄冠素衣，烏帶載於五禮儀，不可輕變。左議政朴淳、右議政盧守愼以為白衣冠正合禮意。上曰：

予欲從左右相之議

大喪服制議

戊申大喪以服制事禮官問議于大司憲鄭述述議
曰禮經為父斬衰以恩制者也為君斬衰以義制者
也三年之喪自天子至於庶人不敝以貴賤有所增
損而漢文變古壞禮始用易月之制歷代因之莫能
釐正晉武魏文欲矯而行之當時羣臣庸陋不能將
順其美宋孝宗獨斷然行之既葬衰經如初視朝衣
冠皆用大布朱子稱其甚盛之德而荅門人通喪之
問則曰當如孝宗所制之禮君臣同服而畧為區別

以辨上下十三月而服練以祥二十五月而服禭幘
以禫二十七月而服朝服以除朝廷州縣皆用此制
又曰制古喪服以臨別制布幘頭布公服布草帶以
朝乃為合禮至寧宗朝上劄請遵壽皇已行之法躬
執三年之喪又當時有司誤用恭紗淺黃之服則請
因啓殯發引之變制復用初喪之服追改既往之失
遂詔遵用三年之制此皆豈非百王不易之正論哉
我國五禮儀亦一代之成書立法定制似非偶然而
卒哭後變服一節最為無據方之易月之制雖稍有
日月之久近而其為短喪則一也豈非孟子所謂百

步五十步之間者乎仁廟朝名儒徐敬德欲上疏極論喪制之失請盡通喪之制其愛君之誠實朱子之遺意也仁順王后之喪因掌令閔純之疏卒哭之後因用素冠素服亦豈非復古之盛意乎今日臣等之見當一依朱子正論定上下通喪之制其有未及於初喪者則用朱子因啓殯追改之意復用初喪之服十三月而練二十五月而禫二十七月而除朝叅公會之時則用今布帽布團領麻帶白靴亦朱子布幘頭布公服之意也然則誠朱子所謂一整數千百年之陋垂數千百年之成憲者而素冠素履之美得復

見於今日豈不為明時盛德至行之甚乎李恒福議
曰服色有司之議是矣無容再議祝辭則健元陵當
稱曾孫嗣王臣孤子某裕陵則稱孤子某為宜於列
祖若稱孤曾孫則非惟有繼祖之嫌語勢不倫上書
曾孫承統之意也下書孤子哀辭也自不相妨豈可
云重疊乎至於裕陵稱子之禮雖無古禮可考我國
儒臣已有正論云有後母生存而遭父喪者前後子
孤哀之稱果似互有嫌疑只稱孤子為得之此言足
斷今日之議蓋古禮只稱孤子母沒加哀以稱之乃
出於後世故朱子嘗云循俗稱不妨云云則并稱孤

哀本非大經常禮今只書孤子無所不可

啓運宮服制

仁祖四年啓運宮之喪以服制事問議于諸臣朴知誠李貴崔鳴吉王稱考妣三年喪別廟之議金長生趙翼王稱伯叔父母朞年喪之議李廷龜張維王稱考妣朞年喪之議上章爭論終不歸一大臣禮官講定稱考妣稱子不稱考杖期之制祭用五虞禮葬時都監堂郎及各該司進排官京畿監司各務差使負并淺淡服烏紗帽黑角帶東朝進見時大殿白直領黑笠黑條兒視事服卒哭前翼善冠白袍烏犀帶卒

哭後深染玉色袍大殿中宮殿所屬內官以下并從服輦輿繖扇卒哭前裹以白色卒哭後變青事定棄因傳教更以勿改以青色事判下

仁烈王后服制

仁祖十三年仁烈王后薨大臣獻議以為家禮杖舥條夫為妻杖父母在則不杖先王朝舊禮雖不載錄自上斷然行之甚盛事也從之禮曹啓皇朝會典孝烈王后之喪成服日為始素冠素服十三日宣廟朝懿仁王后之喪亦依此除服命議大臣從禮官議金益熙疏曰衰服十三日白衣三十日既非古禮又非

五禮儀所載况衰服之制從成服起白衣之制從初終起禮只云生與來日死與往日又曷嘗有衰服白衣各從兩日起數者乎是不過十三日太近故引而伸之三十日稍遠故進而縮之也儀禮喪服妻杖朞条傳曰妻至親也周穆后崩叔向曰王有三年之喪盖妻雖朞服有杖有禪其實三年之義也十三日之後遽釋衰服三十日之後便從吉服所謂至親之義安在且庚子之例凡喪祭世子主之此又大段未安朱子曰凡喪父在父為主服問曰君所主夫人据此則殿下何可不主今日之喪而世子亦豈敢為

之主乎議雖不行識者韙之

昭顯世子服制

仁祖二十三年四月昭顯世子卒世子喪禮無文可據初因上教三日入棺以隸字書銘旌勿設最官守墓官以宗臣都正為之罷春坊翊衛司引文獻通考大明太子喪百官齊衰十三日而除繼用大臣議改以期喪及考實錄更為烏帽烏帶七日而除兩司合啓請依前定期服之制吏曹判書李景奭護軍李植兵曹叅判李滌等上䟽請百官白袍烏帽卒哭而除以應齊衰三月之制禮曹請議大臣更以齊衰三月

而除輔德徐祥履等上疏請從禮經百官定為期制
銘旌更令禮官務得至當答以百官之服既以酌定
似無未盡銘旌當令更議禮曹啓於加謚之日改以
靈柩依實錄又改以梓室

仁祖服制

己丑大喪禮曹啓曰五禮儀服制條國喪宗親文武
百官卒哭後白衣烏紗帽黑角帶云而曾在宣廟朝
臺臣閔純上疏引據古禮請以白帽布裹角帶以終
制限遂為定式前後國恤仍為遵行

追製喪服議

己丑禮曹曰成服時前銜與儒生同為白笠白帶則雖得復職不強更為衰服者蓋以既成之服不可輕變於後也考諸實錄則睿宗朝傳于承政院曰喪服不可追製今新除職者以素衣就仕戊申年執義李慶全初在罪貶之中不得服衰以封玄宮不可白衣行禮之意引避相臣李元翼李恒福沈喜壽議山陵行事既不論喪服執義封墓自是禮文白袍行禮恐無所妨乙亥謄錄前銜復職者白帽白團領熟麻帶行公云遵先朝已行之制

孝宗服制

孝宗十年上昇遐大司憲李應蕃掌令黃偁耆持平
李押大司諫李尚真司諫李俊耆獻納鄭麟卿等請
依朱子君臣服制議行古禮議大臣儒臣李景奭議
古禮之不復常所慨然而平日無事之時從容講定
無所叅差則可也蒼黃罔極之中猝然行之則未知
果能均齊而無或舛差耶先正臣李滉之為此議也
故相臣朴淳以禮官難之己丑罔極之日故儒臣金
集議此禮而故相臣金尚憲難之臣亦以為難焉非
以古禮為不可恐有不齊之患今公論又如此而列
聖已行之制到今罔極蒼黃之中遽爾議改未知如

何鄭太和李時白元斗杓李厚源皆以為前所未行之禮似難輕議儒臣宋時烈宋俊吉議以為千古不易之定制可行無疑命更議大臣大臣之議如前依大臣議施行校理金萬基司直閔鼎重上書及兩司合達請斷行古禮並不從因館學儒生南二星上書更令禮官議處禮曹回啓以事勢難便不得施行及啓殯言者又請延成襄服李景奭再獻議引己丑所陳喪禮辨說中延服於啓殯與朱子所遇之時及其所議不同之語與朱子答李緡善服已成而中改未安之說以明之不果行時議莊烈大妃服制賓廳會

議以不杖期磨鍊翌日尹鐫以小紙因延陽府院君
李時白入送于殯殿都監以為帝王家以緇體為重
慈殿當服大行喪斬衰三年領議政鄭太和以其紙
示吏曹判書宋時烈曰此言何如時烈曰儀禮賈公
彥疏不得斬衰者有四種一曰體而不正謂庶子傳
重一曰正而不體謂嫡孫承重一曰傳重非正體謂
庶孫承重一曰正體不得傳重謂嫡子有廢疾太和
搖手曰吾不知禮說且慶安在何可發此言何以則
可以打破彼說也時烈曰五禮儀勿論長衆皆不杖
期以此定入好矣太和大喜曰此可以有辭矣遂以

國制期年議定翌年庚子護軍許穆復申鑄說作服制圖隨劄投進請改定服制命叔議于大臣儒臣宋時烈宋俊吉再獻議考據經禮力辨其說事遂寢

練服變改議

宋時烈曰小祥衰服或練或不練考之經文疏說及張子黃氏之說兩皆有據然黃氏圖式實承朱子命而修之者今從其說中衣練之冠用練布衰用稍細生布仍換葛經似合於古宋浚吉以為衰服不改殆同村閭貧窶者之所為古禮家禮俱無所據五禮儀所載雖不可輕議列聖以來隨時改定豈可膠守而

不之變乎

仁宣大妃服制

顯宗十五年仁宣大妃昇遐莊烈大妃服制賓廳以
衆子婦大功定八上震怒竄配議禮諸臣右議政金
壽興禮官趙珩等改以期年磨練又延罪己亥議禮
臣宋時烈安置宋俊吉追奪官爵肅宗即位初仁宣
王后喪制未終上當受承重服弘文館啓嫡孫承重
受服期古禮無見處惟儀禮經傳通解宋朝服制令
有之先正臣金長生曰嫡子未終祥而亡嫡孫承重
亡在小祥前者小祥受服在小祥後者申心喪併通

三年而除先正臣李滉曰始死後諸禮父皆已行之
但未畢喪而死故只當代父而行其未畢之禮而已
成服之節但於朔望後朝奠告于兩殯所仍受而服
請依李滉之言卒哭後朔望即以代喪之意告于敬
思孝敬兩殿仍行受服之節上遂於正朝詣敬思殿
服本服期年齊衰服哭拜訖易服傳重衰服行祭吳
挺昌疏云承重受服當依服制令在於小祥命議大
臣領議政許積曰代服必待小祥者古禮司馬操之
說也不必小祥而受服於朔望者先正臣李滉之言
也臣初與金壽恒累日講究則帝王家事與士庶不

同既踐其位行其禮獨受服必待小祥則其間節目多有不便待元日親祭受服為當

中宮從服承重當否議

仁宣王后喪中宮從服承重當否議大臣許積以為儀禮傳曰宗子母在則不得為宗子妻服此言承重之義在於姑家禮曰為嫡孫及曾玄孫當為後者之婦姑在則否此言姑在則傳重之義在於姑其不敢以承重之服服其失之祖若曾高祖以此隆於其姑明矣從議施行

仁敬王后服制

肅宗六年仁敬王后薨禮曹啓殿下服制憑先朝已行之禮定以齊衰成服既從古禮則除服亦當依古禮滿十三月之限而依仁廟朝乙亥之禮十三日除衰後所御黑冕白袍圍領生布帶又除於三十日倣我朝服制期用三十日之意從之又以舉哀在翌曉成服退行當否請議大臣金壽恒以為生與來日死與往日成服杖生者之事歛殯死者之事大歛二日而後始為成服事涉太緩閔鼎重李尚真以為六日成服乃是邦憲之常退行於大歛後二日不妨禮意命從鼎重議朝臣之先承訃者先成服上從舉哀日

行於第六日禮曹啓家禮曾孫適婦小功姑在則否
大王大妃於大行妃服制無可擬之文無已行之例
議大臣閔鼎重以為曾孫婦承重者為曾祖母齊衰
則曾祖母之於承重曾孫婦不可無服李尚真引姑
在則否之文以為不當服命議儒臣林泳以為禮本
無曾孫婦服家禮姑有曾玄孫當為後者之婦之文
而又云姑在則否又曰有嫡婦無適孫婦子婦尚存
其孫婦以下未得為適既無本服又不得為傳重之
服上命依禮金德遠疏論大妃無服之非禮更依大
臣閔鼎重引同襲之義請為三日之制金壽恒以為

禮既云姑在則否今欲致隆於大行妃創為禮經所
無之服是恭承慈殿之意反輕豈非未安之甚乎上
曰古人云義之所在禮有時而變今此服制於禮雖
無以情理有所不然內殿之於大妃固不敢以姑在
無適為三月之服而為應服三年之人大妃於此喪
既有重統之義又有報服之理兩事備焉慈聖為此
喪服適婦期大妃為此喪服適曾孫婦總則各服其
服似無相壓相妨之理以此定行

明聖王后服制

肅宗十年明聖王后國恤時禮曹請依仁宣國恤時

例發鞠時陪從百官到山陵入叅成殯奠後改服淺
淡服烏紗帽烏角帶行展謁禮於宗陵紅門外山陵
立主時摠護使與本曹堂上殯殿提調各一員及承
旨史官俱以黑團領稍遠入侍奉審一如舊例立主
奠畢後隨時反虞而初虞祭則返虞後當行於魂殿
從之三年內山陵展謁時禮節服色議右議政南九
萬議曰新舊陵合享與各享望陵禮兼行與別行或
嫌於主哀或疑於壓尊古禮國典無可憑據舊陵展
謁服色雖曰異於新陵墓藏園寢自是興哀之地故
雖平日拜陵亦變吉為淺淡以此推之以素冠白袍

展謁於舊陵亦恐無害於禮意而但念以素冠白袍
兼行新舊望陵之禮則亦恐有混并之嫌若先以素
冠白袍望拜於舊陵緇以喪冠裹服望哭於新陵則
其於情文無或得當耶且舊陵祭攝行之議本緣服
色之有妨而亦似有嫌於永感延慕之孝思望陵禮
若可用素冠白袍則至於祭禮亦依望陵時變服之
節先後親行似無不可從之

百官進見服

練後內侍及百官進見服色議大臣領議政金壽恒
判府事鄭知和以為內侍以下掖庭諸屬從上服白

衣白帽而至於百官進見服色則殿下未去喪之前固未敢以吉服進見而臣僚既已除衰之後又不當仍着白衣冠該曹之以淺淡服酌定揆以情禮果似合宜金壽恒李尚真等議亦同從之

謁新舊陵儀

上以謁新舊陵儀命議大臣奉朝賀宋時烈議墟墓之間雖去喪之久尚以凶禮處之漢儀謁陵素服舉哭宋帝謁陵跽慟久之以先賢事言之張南軒每上墓痛哭領相金壽恒所謂以素冠白袍兼行拜哭者似得情禮之當上從之以素冠白袍行於舊陵喪冠

裹服行於新陵

儒生白衣黑巾儀

禮曹以卒哭後儒生白衣黑巾請議大臣判中樞府事李尚真以為五禮儀朝臣烏帽之制既變白帽則儒生黑巾亦當變為白巾宣廟既變朝士之帽聖上又變儒生之中則寔是遵先一揆宜斷而行之上曰百官服色既已變改獨士子以黑巾出入學校試場實涉未安今後以白衣巾定制宋奎瀛疏曰聖廟事體之嚴重自別於他所今使守聖廟之青衿變為純素日夕遊處於聖廟至近之齋豈無或未安耶夫逆

人之皂巾青帶朱子之說不啻分曉生徒之學校黑巾五禮儀所載似亦有據則宣廟朝只改朝官服色而不論儒生者無乃當日諸賢實有折衷之深意耶內而太學外而邑校此皆先聖安靈之所則禮文之指出黑巾先哲之仍存不改豈無所自而然哉雖然因此而至於四學與大小場屋皆用黑巾則果是無稽之甚者此則應在釐正之科而如聖廟所在則勿論京外恐不可視同他所一例施行也但試場之設若在太學則白黑之間俱有所碍從科場則黑非所可從聖廟則白非所宜臣之愚意國恤三年內凡大

小科舉設於他所雖如館課襍製亦設於四學而使館官入守聖廟如是裁處無乃得於尊聖之道耶

仁顯王后服制

肅宗二十八年仁顯王后國恤時大殯服盡後宮僚入侍東宮時以淺淡服烏帽帶磨鍊兼弼善閔鎮遠等疏曰今世子日侍天顏而猶且素冠素服不忍即吉宮僚則乃反烏帽烏帶於入直侍之時上下異服儀章不齊壓屈之義反有加於世子此皆人情天理之所當然者耶報罷

君臣服制復古禮

肅宗四十年始命君臣服制復古禮上臨延講曾子
問仍論君臣服制慨然欲復古禮命議大臣儒臣領
中樞府事尹趾完曰君臣服制既有朱子之議仁祖
時文敬公全集以此進劄孝宗時文正公宋時烈宋
俊吉亦以為可行而大臣李景奭等皆以為不便遂
寢不行豈以古今異宜窒碍難行故耶大司憲權尚
夏議曰朱子君臣服議曰斬衰三年為父為君其服
則布冠布衫加衰辟領負版掩衽布襯衫布裙麻腰
經首經麻帶菅履竹杖此亘萬世通行不易之制也
周公著之於前朱子論之於後而國朝喪君之禮既

非喪服又非公服真所謂茅纏紙裹不成貌樣者已
亥太喪時臣師文正公宋時烈請依朱子說君臣同
服衰服而其時大臣有力攻之者遂不行今聖上慨
然於仍襲謬制欲復古禮聖學之高明聖志之卓然
誠不勝欽仰上曰茲事自有朱子定論本無可疑斷
然行之可也

端懿嬪服制

肅宗四十四年端懿嬪卒禮曹啓曰今此嬪宮喪大
殿中殿服制準家禮及大典五服圖則長子妻期年
準儀禮經傳通解天子諸侯旁期服圖則嫡婦大功

世宗朝顯德王后薨于東宮兩宮服大功今則何以
為之王世子服制古禮及國制仍為不杖期當以此
磨鍊矣又曰今此嬪宮喪初終時百官哭臨既為舉
行成服時又當依此以淺淡服哭臨於嬪宮外門外
罷散朝官及館學生亦以素服宣仁門外會哭何如
並從之持平李重協上書引儀禮喪服圖式天子諸
侯正統旁期圖適婦大功之文請延改服制議大臣
儒臣皆以為朱子家禮之所定本朝國制之已行者
今難變改重協再書申論竟不行

景宗朝命復君臣服制

景宗即位初禮曹達甲午特命復君臣服制一從朱子服議更考語類書牘及皇朝禮及先正臣文成公李珣文敬公金集所論作為一通文字已成定制今當頒布中外矣因館學儒生上疏就議於院相及諸大臣浚以雜職前啣不可只令白笠衣帶成服一體以斬衰成服儒生與朝官不無差別以生布麻帶成服事定集

當杖之列

李頤命曰古禮有達官之長杖之文朱子又有嘗任侍從以上得專奏事者皆許受杖之議若從朱子之

議則今則堂上以下曾經侍從者皆在當杖之列中國之郡守亦可杖則今之兵水使亦當受杖矣

練時腰經

命議練祭經帶頒議政金昌集以為練時腰經古禮受以葛喪禮備要云無葛則熟麻亦可或葛或麻隨所備似無嫌練冠及腰經纓子儀禮有用素之文素則布屬管屨變以繩鞋亦在禮書皆漸吉之意也判中樞府事權尚夏以為經用熟葛則絞帶乃承經之物臣師宋俊吉庚子獻議亦以練布絞帶為定論今宜從之命依議

孝章世子服制

英宗四年孝章世子薨逝上曰服制已有先朝不易之令甲當行期服百官則有懿敬順懷已行之例當行齊衰三月之制而今考實錄當初仁廟遵皇朝莊敬太子禮命服期年後因實錄考出齊衰三月當此復喪禮之日遵皇朝已行之禮體聖朝初命之意期服齊衰情禮允當大臣議群臣一周之內凡喪事衰服視事燕居公除前白帽笠衣帶靴公除後烏帽笠帶白衣靴從之

宣懿王后服制

英宗六年宣懿王后昇遐大殿依明宗朝所行及甲辰大喪時例行齊衰三年之制大王大妃依甲寅仁宣喪例行期制

孝純嬪服制

英宗二十七年孝純嬪薨逝禮曹啓大妃服小功戊申曾孫總之制輕重倒置請議大臣領議政金在魯曰戊申大妃曾孫服宣懿妃孫服不成名理今以嫡孫婦小功服磨練實為得宜但禮有嫡子則無嫡孫家禮嫡孫婦小功其姑在則否以此觀之當降小功為總命置之其後喪禮補編命依議釐正

懿昭世孫服制

英宗二十八年懿昭世孫卒宮僚服初定大功領議政金在魯引宋孝宗時莊文太子僚屬服制請齊衰三月葬畢而除從之

正風俗

太祖朝大司憲南在疏曰古者已嫁者父母沒則無歸寧之義其謹嚴如此前朝之季風俗頹敗士大夫之妻趨謁權門恬不為愧識者恥之願自今文武兩班婦女除父母親兄弟姊妹親伯叔舅姨外不許相注以正風俗

三網行實

世宗十六年命儒臣編緝古今忠臣孝子烈女之卓然可法者隨事紀載并著詩贊尚慮愚夫愚婦未易通曉附以圖形名曰三網行實廣布中外第以民庶不識文字書雖頒降人不訓示則又安能知其意而興起乎予觀周禮外史掌達書于四方使四方知書之文字得能讀之今可做此中外攸司得民之有學識者咸使訓誨權採序畧曰家盡孝順之子國皆忠盡之臣南陵白華之什漢廣汝墳之詩將繼作於委巷之間王化之美當無讓於二南云

作聖圖

近世好事者有成佛圖有從政圖皆用骰子權先生
採著作聖圖其目有十三曰論圖象曰論性理曰論
陰陽曰論造化曰論氣質曰論誠敬曰論資質曰論
功夫淺深曰論用切作輟曰論賢智曰論愚不肖曰
論進德先後曰摠論亦用骰子六面書誠敬邪偽四
字但誠敬再書邪偽一書以分數多少為進修次此
圖初非戲玩設也欲學者因其所樂而開牖之也不
知者以用骰子近於博奕不深其意不思之甚角

禁再嫁

成宗八年下教禮曹曰信婦德也一與之齊終身不改自世教衰婦德不貞士族之女不顧禮義或為父母集情或自媒從人非徒自玷其身實是有累名教自今再嫁女子孫不置仕版以正風俗原本作太宗八年今釐正

厚風俗

成宗二十二年教曰至親之人一體而分叔侄有父子之義兄弟為天倫之重宜敦雍睦之行以成敦厚之風昔王商為侯推財與弟薛苞分財以惡物自與今世之人習俗澆蕩或有交爭自相詆怨殘傷骨肉

莫此為甚今後兄弟叔侄起為爭端詐偽著現者并令徙邊以厚風俗

呂氏鄉約

中宗十四年命中外行鄉約法時趙光祖金湜等言
化民成俗莫先於鄉約呂氏以匹夫不得推行天下
而但施之一鄉觀周禮立黨正族師以相勸導者實
鄉約之法也今宜倣周制大立規模上從之他日上
以鄉約設施問于經筵官安處誠對曰近聞京城之
民聚而相戒言不善之事國有禁憲不可犯也上曰
鄉中自相常勸則刑罰從而省矣然京城則不可設

法行之尋命京城五部官分給呂氏鄉約于坊里

感人為孝

李旻雜記曰金正國為黃海監司民有告其子歐辱者正國拿致使之上階而問之曰汝犯常刑必殺無赦仍言父母鞠育之恩其人若有愧色叩頭曰村野之氓有何知識唯知親愛爾汝之成習不思尊敬嚴畏之可憚今而後始知天倫之尊國法之嚴矣正國翻然曰此人自言無知犯法且有服義悔過之誠此而可殺非法意也其人後為孝子

漢陽新宮宴

太祖四年上誕日羣臣上壽賜羣臣宴上夜召判三
司鄭道傳等諸勲臣置酒張樂酒酣上謂道傳曰寡
人之得至此卿等之力也相與敬慎期至子孫萬世
可也道傳對曰鮑叔曰願無忘在莒時臣願殿下無
忘墜馬時臣亦無忘鎖項時則子孫萬世可期也上
曰然上歌文德曲目道傳曰此曲卿所撰也卿宜起
舞道傳即起舞上賜龜甲裘歡甚徹夜乃罷

裘以貂
鼠皮裁

之黑白相間為之
其文猶龜甲故名

賜宴掌樂院

成宗二十年教曰古人翫月有以適值佳節借以君

恩選清涼之地樂太平之象不亦美乎遂命政府六
曹判書經筵堂上弘文館藝文館承旨注書翫月于
掌樂院賜酒樂

九進饌

國家宴禮凡九進饌曰饌案曰大卓曰大膳曰小膳
曰別行果曰饅頭曰割肉曰鹽水曰湯鹽水者以鹽
水黃鵝故謂之鹽水唐鴈湯也湯者所謂別味數也
每進爵輒隨進也

樂與呈才不同

樂則第一爵奏與民樂慢第二爵樂同進小饌奏千

年萬壽三爵奏五雲開瑞朝進湯奏清平曲四爵奏
井邑慢機進湯奏桓桓曲五爵奏步虛子進湯奏夏
雲峯六爵奏與民樂慢進湯奏洛陽春七爵奏步虛
子令進湯奏維星曲八爵奏與民樂令進湯奏靖東
方之曲九爵奏步虛子令進大膳奏太平之曲呈才
則曰猷仙桃曰壽延長曰五羊仙曰拋毬樂曰蓮花
臺曰夢金尺曰鳳來儀曰牙拍曰饗食鉞曰舞鼓曰處
容舞曰炎袖舞

進豐呈

仁祖二年進豐呈于仁穆大妃禮曹啓曲豐呈時外命

婦入祭節次議大臣尹昉申欽曰豐呈之禮五禮儀
無可考曾聞先王朝大殿行禮後中殿率內外命婦
行禮大殿行禮時則命婦出避公翁主王子君夫人
則或以家人禮侍祭外宰夫人當於中殿行禮時入
祭

內宴

英宗四年進宴于大王大妃越三日又進宴于王大
妃務從節約遵慈教也王妃方居府夫人喪故不祭
司經李宗城奏曰內宴非女樂則不可以為樂故女
妓選上於外方然其為非禮之規大矣東宮春秋方

富正當蒙養之時尤宜致謹而不審殿下於非禮之
視果無所動否乎上曰每當內宴春宮入侍故自前
春坊例有陳戒此雖近於文具其在愛禮存羊之意
不可廢之而今則未聞此等語予用慨然古有韓休
知否之言儒臣若入侍則必有云云矣予學問雖淺
豈動於女樂乎雖然難制者心勉戒之意好矣

以鴨代鴈

英宗乙巳教曰鴈則信禽而名編月令故頃年稟于
慈聖凡諸供新一併停捧而於大小宴享猶在此後
亦為除之以鴨代鴈

國恤輦輿用玄

顯宗已亥禮曹以大王大妃輦輿儀物請問于大臣
儒臣諸大臣以為大王大妃方在期服中與三年喪
有別輦輿儀物當用玄宋時烈以為大王大妃內持
衰麻外用玄黑似甚無謂蓋五服之人喪次主素而
他處主玄後世之末失也然常人壓屈故程子以為
不禁冒衰守常至於人君則不然春秋之義人君不
言出蓋雖下邑自與宮內有異故國中無非自伸之
地而以示王者無外之義今大王大妃持先王之服
而未免有變改之地則恐違春秋之義從時烈議

元孫有屋輜

英宗三十六年教曰元孫乘有屋輜封世孫後其乘稱輦而世子輦七間十四名此則五間十名所謂有屋輜雖此輦差等此乃婦人所用於禮何差等輦稱小輿制樣依輦五間十名此乃義起問議後仍為定制

箕子杖

尹根壽曰平壤有藤杖一雙相傳為箕子杖一則中折以黃錫包束其折處盛之漆匣凡監司出衙驍騎兩人持而前導監司坐而聽政對賓客輒植之階上

左右承以朱漆木壬辰倭亂見失云李晬光曰箕子杖今在平壤府乃三千年物也古人以孔子硯為古物此則尤古矣

箕子笏

江陵人李有根家有世傳古烏玉笏短而且狹與我朝之制大異其面刻痕微有箕子笏三字舊老皆以箕子笏稱之襄陽文官崔達泰作序緘送于判書李德壽轉入于楓宸云

皇明賜冕服

太祖三年高皇帝賜冕服九章圭玉佩王妃珠翠七

翟冠霞帔金隆太宗二年建文帝賜冕服成規曰太宗朝王妃冠服自大明而來宮中不知翟衣披荷之法乃招明昇母彭氏曾為蜀國皇太后入宮指教然後始服之陳理無子只有外孫倪常從其外孫曹公家見其所藏刺繡紋錦

明昇母

明太祖平蜀漢僞主明玉珍之子昇陳友諒之子理皆流于我國詔曰不做官不做民我國給茅舍臧獲俾安接之昇母曾為皇太后者也太宗朝王妃冠服自大明來宮中不知披荷之術昇母入宮指教然後

乃得知之

世子冠服

世宗十年王慮世子冠服無定制會大臣議下季良啓請遣使以奏上因送季良宣宗皇帝降勅賜世子六梁冠

遠遊冠

世宗二十年英宗皇帝賜遠遊冠絳紗袍玉佩赤舄禮判許稠言謹稽古制唐用韡袍謁先聖韡袍雖不詳其制疑今之絳紗袍也上曰絳紗袍臨羣臣之服豈可服此謁先聖乎我將服衮冕以謁

世祖儉德

徐居正曰世祖性惟恭儉嘗入內殿見御紺色木綿
帟裘穿青草鞋笠纓用純木携竹杖雖漢文澣濯亦
不如是之儉素也

宣廟儉德

鄭載崙曰宣廟時臺臣有以近來服飾華美為言者
宣廟披裏衣示之曰予衣亦用綿布臣子服用豈有
過於予者耶諸臣惶愧自是後習一變所御綿布衣
尚在其時王子家後孫云

世子服色

李恒福議陳賀時世子服色曰先冊世子具服行禮
乃始奏請則儀物等威已備於詔冊之前矣況今世
子所用冠帶儀物已備禮秩其未備冕服特未遑耳
先王定禮今日常儀俱已如此臣意世子具服入賀
無所不可

世子玉帶

大明會典一品用玉帶二品用犀帶玉則已重犀則
涉於輕通典有皇太子有金飾象笏之制亦有玉導
寶飾之制倣此而用玉質金飾之帶則上別於世子
下異於羣臣似或當矣

世孫水晶帶

禮曹啓曰元孫玉帶與世子之帶無別亦涉未安月
令篇有蒼赤白玄之分世子所執之圭亦青色元孫
之帶用以青玉稍別於世子之帶恐當教曰頃年使
臣金堉回還時都督付送水晶帶其用於王公可知
李景奭言水晶帶古制無可據伏見下教始知中原
盖有此帶有司之請用青玉意亦有在請擇於斯二
者上命用水晶

貞慎翁主喪

徐文重言祖母貞慎翁主之喪以宣廟遺衣襪用於

送終即青染三升短襦衣及三升襦袴也想必平日所服皆如是耳

拜陵儀

孝宗八年教曰拜陵之時戴笠乘轎終覺不便其令儒臣熟講以定弘文館啓曰陵幸時冠服考諸五禮儀翼善冠袞龍袍而無分於轎輿也

焚銀鼠裘

肅宗十七年嘗以銀鼠皮作御裘權璫引晉武帝唐玄宗焚雉頭裘錦綉帳之事陳勉上即下銀鼠裘二領於政院命焚之

始正大帶之制

肅宗三十九年命叅考五禮儀大明會典釐正進御冠服始正大帶素衣紅裏之制金字杭閔鎮遠金柱臣閔鎮厚朴弼明等議以大帶紅表素裏與古禮及會典相反大綬聯付於大帶反掩覆大帶

襄陽玉圭

英宗十七年襄陽文官崔遼奏以青玉圭送於趙顯命曰壬辰亂江陵留陳之地得此圭也顯命白其言上取而覽之命尚方依古制以青玉造諸侯及世子之圭周尺長九寸廣三寸厚六分蓋倣永樂欽賜之

制也按此是寶鑑所載而江陵邑誌亦有崔達泰所
進箕子笏之事豈非此圭之外又有箕子笏歟

平壤古圭

英宗十八年有人得古圭於平壤土中以獻曰此箕
子圭也上以問筵臣對曰殷尚玄箕子圭必玄而今
不玄伊青非也上曰然此必皇明高皇帝所賜與我
國而失於壬辰西狩者也

集祥殿古玉帶

英宗三十二年教曰東朝偶檢集祥殿舊藏得一玉
帶賜予即宣廟所御而肅廟乙亥御此帶朝叅以諺

文備書前後事於帶匣今得之亦異矣明日遂御玉帶焚香于璿源殿是秋亦以此帶試士子勤政殿御製玉帶銘曰此宣廟朝舊帶而昔年亦為進御者也以諺字書曰宣祖大王玉帶子乙亥正改修補進御朝叅時云累回敬玩涕泗被面銘曰問寢東朝暮春望前特將舊帶命我玩焉穆陵進御百四十年昔我聖考復御臨筵雙手敬奉涕泗漣漣匪風之恩莫能盡宣拜手綴銘與帶同傳

英廟儉德

正宗御製英宗行錄曰王不着紋緞亦不御紬袴所

御之衣亦多屢澣而至有見絮者又元陵行狀曰嘗
教曰昔我先祖衾與襚皆木綿布宮中傳為美事予
不喜奢華且以聖祖為法故令尚方製黑布笠他日
必見予志之少展也又嘗語筵臣曰予自辛丑承儲
慨然欲以大帛大布挽回世道予着錦綺而使羣下
着木綿則亦不能行矣尚方織錦坊可自今永撤勿
復請設

祭冠

李晬光曰高皇帝洪武初欽賜陪臣冠服此中朝臣
下九等遞降二等陪臣凡七等其一等秩比中朝第

三等賜以五梁冠服二等比中朝第四等賜四梁冠服三等以下以此遞降故陪臣不敢着六梁冠云

宵背

端宗二年命文武百官團領宵背之制倣皇朝儀章照品穿着仍賜宗宰七十二人緞各一匹

金帶之戲

光廟與貞熹王后同坐召尹弼商夜對勸以酒醉之潛脫銀帶換以金翌日早朝親御政弼商顛倒衣裳不知帶金傍人覺之相嗟訝俄有叅贊之命

宦官服色

崔萬理疏言宦官之不合着紗帽曰閹寺之流不可混於縉紳倣中朝例使之着冠言甚至切宣祖初辛應時又建白事竟不行

預賜品帶

成宗十七年特賜金帶于吏叅金宗直曰卿為近侍久予知卿將受國家大任也又賜犀帶一腰于禮判李坡曰嘉卿典禮三載無錯誤公退之暇不忘經史也又以唐紗帽賜承旨曹偉曰衣冠當從華制故此賜之欲使人觀法也

朱溪正論儒服疏

朱溪正深源疏曰古者聖人制為冠服齊內外明威儀使人知有別於禽獸我東自麗儒鄭夢周建議革胡服有官者紗帽京外學生平頂巾及我太宗朝生冠服依中朝國子監生例然後千古弊俗一大變也今聞殿下令儒生於街路着青衿而不許頭巾然則身可為儒而頭不可為儒耶治莫大於文教教莫大於禮儀願殿下察之上御書嘉獎

煖帽

百官煖帽之制本甚不典宣祖初權輿建請依華制改定時論美之李晬光曰今之耳掩舊稱披肩按征

討錄成廟朝命造披肩二千分賜士卒是也中朝則謂之煖耳雖盛冬必肯下後百官始得戴之

君賜不敢私受

宣祖二十一年尹斗壽為關西伯內賜金帶于其子昉使遞送于其父昉下庭跪奉還授使者曰宣賜不由政院不敢私受相傳人以為得體

黑團領之制

宣祖三十二年始定黑團領之制初國俗有官者着紅團領堂上以上服淡紅綃表單堂下則用深紅綿布表單華人以君臣同色非之至壬癸倭亂以後

倉卒不能備威儀士大夫皆着帖裏戎戎上下教曰
大小朝官皆用戎服七年于茲上下無別天朝謂其
本來如此嘲笑不已今海氛已息國內粗定自明
為始一齊冠帶以復平時之規於是使有官者皆服
黑團領稍遵華制李恒福議百官章服所以為文章
而辨貴賤也其於國家聲容所關甚重自祖宗朝著
為定制各有等級頃日該曹啓復冠帶非無稟定節
目且有自上別教而隨意製造務相華美不知有上
下等級此事猶然他尚何說國法惟堂上以上乃得
衣絲堂下則各服土產蓋不欲取辨於上國稀貴之

物以耗一國之力而其辨別尊卑崇儉抑奢之意亦在其中今物力單薄若使急革則求以抑奢而反益傷財宜預定期限自明年國喪小祥後變服時凡堂下官絕不如前衣絲各服土產紬苧綿布等衣以復舊制

服色紅色議

宣祖三十四年懿仁王后服除更議服色因禮判柳根建議紅色李恒福曰改定服色之論其來已久以為一遵華制變紅為青為宜臣於時以為衣冠大典係國家文章關威儀盛衰足為文治之精華貴賤

之等級不宜草草講定己亥八月又欲具冠帶臣又
獻議姑待物力稍寬便可得行臣之前後所論服色
不可變冠帶猝難具也雖然當時欲變之日國命
新政當改紀慕華變青以新一代之觀瞻雖非先務
亦不無所見總過數年無端又改有似見戲當時議
改之時臣又以禮文時服常服之別難之則議者以
為勿論時服常服皆着青色無妨此言亦通臣嘗閱
政院日記成廟初年以朝臣服色雜亂無章議為定
制常用鴉青草綠木紅以便易造此外不得用玉色
緇色灰色淡黃等色云則先朝服色初無定制至成

廟朝乃定而猶雜用三色不知何時一切用淺淡紅色也今於經亂之後猝有冠帶尊卑同衣絲絹旋定尊卑之分又改紅色數年之間紛紛更加朝家體面姑不可決臣前則決不可變紅為青今則亦以為不可變青為紅也

利布之禁

李陞曰近世下吏之賤皆着紅花色紅花乃利布所謂利布者言其價重也且唐絲交織之布細密雖其功百倍堂下官以下不得着持國法所禁也明宗丙辰鄭瑄以故相順朋之子以此見捉於憲府禁吏

國法之嚴可知

紗帽

李濟臣曰我國紗帽制度不與中朝相侔自國初
右無角後垂黑纓所見埋沒故公故出入士大夫恒
冲正冠明廟丙寅朴忠元赴燕見中國涼紗帽制度
費價賈来自此與中國同制李睟光曰今之紗帽本
唐中之舊制為軟脚垂下後乃附升用鐵靴子出於
胡服而以其簡便故天下尚之

大明集禮外國使臣服

大明集禮載諸國使臣以朝服入班而大明會典云

外國使臣各服其服入叅故我國使臣以時服行事
久矣頃年鄭經世赴京時集禮之文以朝服為正呈
禮部不許又曰我國謂梁冠衣服曰朝服黑團領曰
時服紅團領曰常服帖裡曰戎服國俗自前有官者
皆服紅團領華人以君臣同色非之壬辰變後亂離
倉卒士大夫皆着帖裏己亥年間始倣中國服黑團
領至辛丑柳根為禮判建議依平時改服紅色至今
相承蓋人情樂於從舊故也

公服

平時凡衙門公禮及新除授官肅拜叅謁皆着公服

而亂浚仍廢不復唯新及第應榜服之云

壬辰後佩釵

壬辰後命羣臣戎服佩釵蓋示復讎之意云

侈風

李晬光曰余少時見先君平居待客常着布衣雖朝服未嘗有綾絹之飾及長從仕槐院見許多提調中唯黃廷或尹卓然着匹段袷襖餘無有焉今則綵陞堂上者表裡皆着綵段或用白紋段為襦裙至於市井下賤服飾之華美固有紀極蓋自東方以來奢侈之風莫甚於今日云李好閔素尚儉約不喜服美宣

廟嘗下教曰今日筵臣衣俱文綺卿獨不然深用嘉尚因舉示御衣乃綿布襖也左右大慚

朝服呈文

李廷龜朝京呈文禮部曰我太祖高皇帝定為一代之禮陪臣冠服之制欽蒙列聖頒賜進貢陪臣皆令以朝服行禮集禮之書刊行中外小邦遵奉此制罔敢違越凡遇節日望闕拜表迎詔等禮君臣上下皆用法服獨於進京朝賀萬國會同之時以玄盤領事不得以禮服隨班是天朝頒布之禮制行之於國中而廢之於大庭也事係儀章實關國體安敢因循

苟且不為釐正而自外於聖朝同文之化哉煩乞遵
照集禮使小邦陪臣許以朝服行禮鄭經世呈文曰
盤領之制本非法服况玄之為色古人用之為齋
禮曰齋之玄也以陰幽思也今於萬國會同易數率
舞之地奚取於陰幽之義當初小邦陪臣不識禮制
用此無據之服因循襲謬以至於今高皇著大明集
禮有曰蕃使於奉天殿朝見依品服朝服行禮制禮
之意大如天地昭如日星伏乞稽之皇制叅以禮意
許令朝服入叅以舉廢典以整朝儀

狹袖議

孝宗朝嘗與筵臣語及我國衣服之制曰前朝鄭夢
周還自中原始傳紗帽團領之制蓋中原雖戰陣亦
以冠帶從事我國笠制極其駭異帽子太高涼臺太
闊出入門戶動輒罣碍至於衣袖亦太長闊不便行
步曾見大明會典武士衣袖僅容其手良以戎服取
其輕捷也我國戎服帖裡絲笠徒拘束其動作何益
於行陣哉鄭太和曰聞壬辰後嘗欲依中國之制上下
皆戴小帽子而竟未能行云矣上曰道袍之制亦
壬辰後始有之大抵此等初無定制只因一時俗尚
輾轉變易也

入直戴冠戴笠

弘文館志云闕內入直官負常着紗帽不敢戴冠巾
及笠獨玉堂春坊戴冠兵曹提府戴笠或言祖宗
賜冠于玉堂遂成流例春坊自以與玉堂事體均等
倣而戴冠云

侈風之變

李端夏疏曰世宗大王嘗憂閭閻頗有侈風言及於
相臣黃喜對曰臣當有以矯之後登對喜以大布為
章服及裡衣人見曰臣統率百官而自臣身始如此
百僚何敢踰侈乎然自上亦知此意躬行示儉為當

世宗納用其言一時倭習大變云

白衣之禁

肅宗十七年申白衣之禁國法元有禁白衣之制自明宗乙丑以後累經國恤仍着素衣每為華人所笑宣祖申禁之士人無職者亦穿紅衣直領顯宗朝又禁之士大夫皆遵行數十年後又因循廢閣至是又命禁白衣着青衣英宗二年教曰自古有國服色各有所尚我國在東方宜尚青上自公卿下至士庶令着青衣十三年李成中筵啓既以白衣嚴禁事方有申飭之教而雖以青衣言之人之所著名雖青衣

色甚淺淡有非朝家所以欲着青衣之意亦為申飭何如上曰自備局一體申飭可也十四年命申嚴白衣之禁李德壽疏言萬物始於東成於西東方之尚西方之色蓋取其有始有終況東俗尚白前史多記之若隋書宋史及皇明董越所錄是已俗之成也數千年今而改之未見其可也上曰元亨利貞所包者元也惟元也故能永貞秋冬之所以成終亦春也我國尚白雖是先儒之言不過謂其俗尚也我國處於青丘立國以仁其色尚青所以從仁也況忠質文之迭更亦有隨時之道顧今世道刻薄生民蕭然朝

廷之上未聞仁厚之風此時當尚青乎尚白乎四十三年下教曰頃者飭白衣之時人或曰箕聖之來朝鮮也其亦白衣此我東風俗云噫彼箕聖當殷之末武王封於海東以麥秀歌觀之箕聖之心可知逢聖人陳洪範來朝鮮教民八條有仁賢之化後之人不體箕聖之訓只慕其衣豈不迂哉

絲帶

金柱臣曰我東公服用角帶私服用絲帶而絲帶不過數分垂之不及於衣裔而章甫間有革帶者長廣亦如之制本甚輕不患拘掣故雖燕居未嘗解去

獨戎服所用廣絲帶廣幾盈寸欲帶於閑居則重大不便矣想中朝常服帶樣必如我朝戎服廣帶而其長與廣必比此有加

綠袍之始

英宗三十三年教曰堂下官綠袍即壬辰後新創者近世則流俗以鮮紅為務糜費夥然此乃尚侈之一端自今堂下青綠袍一遵經國大典而我服則舊典既無仍從續典

玉頂子

英宗教曰見經國大典都憲觀察使節度使皆玉頂

子監察水晶頂子此乃法典則凡陵幸時畿伯玉頂
子前飾今去過矣今後依前飾之都憲玉頂子監察
水晶頂子皆復舊典都憲獬豸褙子亦復舊例

表衣之制

大小人負勿論文武職表衣前則去地三寸後則去
地二寸袖長過手復回至肘袖椿廣一尺袖口七寸
庶民表衣前則去地四寸後則去地三寸袖長過手
六寸袖椿廣八寸袖口五寸裏衣亦以次遞減分

私家立廟

李濟臣曰鄭圃隱廬墓側立家廟之後我朝士族無

不效之而國初家廟猶未盛自經己卯諸賢申正世道而為士家者無不立廟云

別廟

世祖二年命功臣子孫三廟外別立一室以奉其祀從禮曹之請也金長生曰若有親盡之祖始為功臣者則當依家禮別子親盡遷于墓所不埋而但國家待功臣甚厚使子孫不遷其主則祭四代之家並不遷之主乃五代也據禮人臣不可祭五代不得已高祖當出而祭于別室耶朴世采曰始為功臣者別立一室昉於我國蓋倣古者始封之君為太祖廟之義

然國典本使士大夫止祭三代別立一室猶未上僭
於諸侯之制故也今若以此合於家禮四代奉祀之
法則正是諸侯之制此所以有備要高祖當出之說
不可以帝王家世室之論也

紙牒

成宗三年上聞士大夫家多不立廟以紙牒教曰世宗
朝命士大夫依文公家禮使之立廟庶人立淨室祭
以四仲朔今此制陵夷士大夫尚多不立廟者况庶
乎其令禮曹另加檢察

正寢

成渾曰鄭述欲作正寢于祠堂之前以太廟祫享昭穆位排列高祖居奧而東向其餘昭居北穆居南以祭之云同堂西上之制雖曰習之陋而程朱以國未復古故不敢私為古禮之正則今日行之無有干僭未安之義乎

三獻

成渾曰鄭述論祭禮云三獻俱是主人主婦長男為之雖伯叔父不可為也其義在於主人為初獻諸父尊行不可為其次以亂尊卑之序也

合設單設之論

金柱臣曰凡考妣位忌祭吉祭古禮無合設之文文公家禮亦只設一位而今俗因退溪栗谷諸先賢之論有合祭之規矣士夫家祭禮亦自不同或有只祭當祭之位者或有並祭者而至如有再室三室之位則合設實多難便如飯羹麪餅不得不各設而飯羹各四甌麪餅各四甌合十六甌并魚肉湯炙實果蔬菜脯鹽葍物決難於一床卓上分排此已難處而且考位及前後室三位非其諱日而每年每享四次設奠亦甚煩瀆此正有禮煩則亂之嫌今俗雖於忌日合祭兩位至於再室三室之位則依古禮及文公家

禮只祭當祭之位恐合於情文也

澆奠床及道先生致祭

英宗七年李汝迪筵啓外方澆奠床及道先生致祭
肉品無節務為豐侈之弊上曰國家殯殿及園寢享
祀皆用素而京中賜祭亦不設肉其式簡略而外方
如是此乃等威紊亂之致朝命致祭是為榮矣何暇
計其豐約乎尹淳曰蓋外朝澆奠固不至薄畧雖薄
畧亦不必生事而宗臣則或以祭需之不如意有推
責本邑之舉故祭需益無限節此事當為榻前定集

立後

趙克善曰我國之制使為人後者書其四祖并書生父之規或言自宣祖受教為始云

已死者延成繼後

縣監沈詒上言從子世說取來撫養遂至成長未及呈禮曹立案而世說身死臣於世說稱父稱子已至累年其妻以舅待臣其子視臣以祖今以其死而棄之則倫義乖傷乞依例立案許之

為系孫以死者入後

東城君申景裡妻李氏上言姪子申坡雖已死乞以坡子汝哲為系孫大臣議以為父子大倫也申景裡

及申垓卒逝已久兩魄之定為父子古無規例有子
然後有孫世豈有無子之孫乎命依議

鮮于氏

李廷龜撰崇仁殿碑曰馬韓末有戾孫三人曰親其
後為韓氏曰平為奇氏曰諒入龍岡烏石山為鮮于
氏韻書曰箕子支子仲食采於于因氏以鮮于趙孟
頰贈鮮于樞詩曰箕子之後多髯孫鮮于之為箕子
後甚明洪武間有鮮于京者為中領別將其七代孫
寔自恭川來居殿側遂以寔為殿監子孫世授

關北人系後只告官

北伯南九萬啓大典立後條無子者告官立後云而
別無入啓之語北道之人距京師絕遠入啓立案其
勢未易宜有定式禮曹啓令本官兩邊捧招枚舉啓
聞公私賤則自本官成給為宜

濟州俗變

金淨謫濟州其俗尚淫祀矇禮制淨述喪葬祭儀導
鄉氓風俗大變

相臣卒百司吏隸設奠

太宗朝相臣趙浚之卒文宗朝相臣黃喜之卒百司
吏隸皆設奠宣祖朝貳相李珣之卒從遊之士以至

窮鄉村氓聚會相吊太學生徒及禁軍市民各司吏
胥哭奠盡哀發引之日執炬者連亘數十里

為罪人服

金尚憲與柳希奮為本生姨從也癸亥希奮伏法之
後尚憲曰在國家則為罪人而於吾親懿固在何可
不服製為總服人以為難

喪後服

李濟臣曰近古國俗脫父母喪未及終制者皆用黑
五十竹草笠垂黑木纓白衣白帶此至禫過而純吉
蓋中古士人平時常着淡黃白草笠若今之上殿別

監及司僕牽馬夫所着也其後士夫所着草笠變白為黑而禪前之笠亦從而黑白布裹笠則惟國恤着之今右相盧守慎遭父喪祥後以遽黑未安用白布笠如國恤時所着鄭澈亦倣而用之自後禪前之笠或白布或白草或黑草各任所見無定制申黜啓於經筵遂定以白笠之制

禪月出仕

近世士大夫禪月皆不仕而李敏迪崔錫鼎皆禪月行公孝宗朝閔鼎重禪月拜校理入直時將開筵講詩傳鼎重陳䟽以為禮曰禪而從御又曰從月樂今

臣之出而從仕雖不敢辭而登筵講詩有所不安請
遞上特許入侍而使下番開讀

外任身死給駕牛

肅宗元年許積啓曰外任身死者自備邊司分付給
駕牛運柩而外方人來仕京中而身死者無此規此
不可異同自此以後遠道人無家屬旅宦京中而身
死者依外任身死例給駕牛運柩何如上曰依為之

紅緞銘旌

鄭載崙所撰公私見聞曰隣坪大君之喪孝廟臨哭
凡係治喪之事親自照管內侍進式例以紅綃銘旌

資進之特命以國喪所用紅廣的緞用之仍命隣坪夫人叔父判書吳竣書之竣執不肯書上曰非有君命而用之則僭也是予面賜者無不可也竣不得已書之其後王子女家非有上命而皆援隣坪例用之外朝士大夫亦效之遂視為常事識者寒心云

外棺着漆

鄭載崙曰外棺着漆只行於大行之喪自餘則雖王子女之貴不得為之肅廟丙子年間有倭譯喪其妻漆外棺如國喪之為宰相臺諫聞而駭之而其人家貲累萬竟不能摘發識者憂嘆

閔家議主喪

教官閔業篤學好禮臨事必援據古禮及卒其子世益狂易不可以主喪諸議以業好古遵禮議立喪主問于朴世采世采採宋光宗古例使其子慎服喪其家更質于宋時烈時烈亦以為慎當服喪議以克合以慎為喪主清風府院君金佑明以誤禮蔑倫筵奏慎謫廢世采以誤禮亂統被罪時烈雖以大臣勿問而時議崢嶸訾謗噂沓云

金家嫡庶之分

正宗九年濟州人金瑞鏡娶高氏謂有可去之罪呈

官受題改娶文氏生子鎮允後復與高氏生一女瑞
鏡父母之喪高氏依例服喪及高氏死鎮允以黥母
喪之說訴于官家許以黥母之喪屢經官卞丙申御
史柳烟刑推鎮允至是鎮允子潤玉以以嫡為庶為
父訟寃備局啓曰黥妻改娶國法之所不許一室兩
妻是瑞鏡之罪而及當高氏之喪改娶所生子鎮允
服黥母之服其父之妻即渠之母也始雖黥之末乃
還畜則謂之前母可也高文兩女之於瑞鏡俱有婚
狀俱以妻載之帳籍可謂此亦妻彼亦妻母論前後
妻之所生當為嫡子鎮允庶名特為伸理之意分付

本牧何如荅曰逖矣絕域氓俗蚩蚩有妻娶妻在法
當禁况呈官黥妻亦得許題該牧使特報論罪高女
則見黥而還畜文女則被聘而往嫁謂之前妻後妻
當然鎮兌自可為嫡產而失禮持服之罪令該牧叅
量懲治特頒疑禮問解疑禮類輯各一帙令本牧藏
于鄉校使民服習咸知朝家扶名教牖迷蒙之意可
也

[illegible]

